

序



唐以詩取士初盛中
晚作者亡慮數千百
家故其間古調新聲

序

皆極才人之致而要
不悖於風雅之遺近
代以來首重經義益
以策論表判而不及

詩獨選人翰林者俾
肆力於吟咏而開館
教習徃徃以詩之工
拙第其高下今

天子右文每科於臚傳
唱第後

臨軒親簡英妙絕倫者
讀書中秘日有課月

有程時進諸

殿陞面校其藝躬爲序
次賞罰隨之安丘錫
餘曹君年未弱冠登

乙未科高第

上臨南苑親策試風日

之下亭午

御製題始頒發作詩論

援筆立就

上目注之命左右取閱

大稱賞徧視諸君尚

吮毫構思慘澹經營

未已也因拔置第一
自是每試皆先上

御覽甚至遊獵扈從天
寒暑短數題並出亦

倚馬立成琅琅可誦

上於諸翰林中獨重錫
餘而錫餘詩文名亦首
噪長安薦紳先生號

爲宿儒亦歛手避方
將大用念年甚少俾
外歷監司練習政事
通達民隱以老其才

始命分守荆南再進
備兵中州所至咸著
聲績一日自宛丘走
使緘一帙示余曰彙

輯六年以不詩將授
梓先生其爲我序之
余惟詩之一道近時
學士家或以爲小技

多

故時

派

以衰

詎

文尼

山

定三

白篇
經與

書思
禮記

傳如
月之經天江

地日爲小技

不倫實甚特競爲時

派者或失之艷或失

之靡風雲月露自遠

於六義四始之肯言

序

八

之者無關於性情聞
之者不足以感發是
謂野狐邪魅先朝李
本寧太史斥之爲詩

妖何技之足云今海
內士大夫鼓吹休明
振起風雅颯颯乎欲
比隆唐人而樹幟登

壇執此道牛耳者咸
首推相國劉憲石先
生憲石身余其相切
劇者二十餘年論詩

必先格調通之性情
期於近法李唐以遠
追三百篇遺音務使
言有盡而意無窮斯

非苟作者者常操是法
以相海內人之詩合
焉者之謂正派離焉
者之謂時派不失尺

寸故憲石蔚爲斯道
主盟其相業之端正
介特亦復如是今讀
錫餘詩古近體皆雋

上奇警才氣過人而
揆以法度無錙銖毫
髮爽如程不識之兵
鉦鼓嚴明坐作進退

皆合基伐此幽燕老
將之風豈少年時賢
所可幾及耶盖錫餘
以憲石相國爲外王

父淵源所自於詩之
一道固有獨得者嘗
攷史平通楊侯暉司
馬遷外孫讀外祖太

史公之記以材能稱
當世羊開府母爲蔡
中郎女子遂爲一代
宗臣茲錫餘年未及

壯文章政事已自籍
甚天壤異日者各山
之巖端揆之業何難
身外王父輝映後先


寧獨詩耶白太傅有
云中郎餘慶鍾羊祜
子幼能文似馬遷余
舉似以當錫餘之於

憲石其誰曰不然

庚子春莫溟梁釣叟

薛所蘊題於翁園之

宛委廬



序

錫餘曹子余同官憲

石甥館聞孫也龍友

鳳毛蜚聲塾序弱冠

序

又一

讀書中秘于國籍淹
通無手棘臆格之患
每試輒上等又肆餘
力于風雅之林撫漏
領新森然架度由夫
慧裕編摩識周去取
神清繹鵠力勝排檠
也

上以吏事未習文學徒
矜試諸楚豫盤錯間
期老其才無不迎刃
誅解今復程勣內晉


則非僅以文學矜長
也獨于言志一道有
不欲自覆者彙梓館
課宦游諸什就正于

外祖余欽夫駒步之
已具千里也豫章之
甫出七年也精鏐之
始一二鍊也而追風

之勢凌雲之槩麗日
鑑水之精光駸駸乎
不可御視邇來風雅
壇坫共宗安丘型篁

在前冶鑄尤易以慧
識神力如錫餘日就
而月將其所請烏乎
可既哉因憲石之命

筆諸簡端西蜀老史
胡世安題



澹餘詩集自序

憶自甲午歲初學聲

律及入館後以詩爲

課性情所至時成吟



序

咏戍戍外除以來風
塵道路有觸輒書已
亥歲杪自楚移豫偶
檢笥中遂復成帙春

正之暇出而汰之付
諸剗劔雖災梨爲罪
亦足以識歲月爾

時庚子春王月北海

曹申吉自記



今上之二十九年既

允軍機大臣議奏特立先中丞傳於功臣館所辦殉難大臣第一集內復

勅工部設位昭忠祠春秋時祀蓋去中丞就義之日於今遂八十有四年矣餘歿不靖禍起藩服不獨忠義奮發致命遂志睢陽平原賈恨今古乃至生平撰著亦既譽溢當時聲施後世而一經兵燹遂復銷沉散佚不盡流布有足悲者中丞詩凡數種自吳難後澹餘前集板既漶漫最後黔行黔寄二集原板亦湮滅無存當我曾大父儀部公出貳新安遇鄧孝威先生於邗上得江闔

孝廉在貴竹中丞所授二冊爲刻入詩觀六十餘首張
山來先生潮曰二集久埋塵土今一出而光彩射人深
思老筆掾以青蒼西樵評盡之矣漁洋亦曰安邱二曹
齊名中丞淪沒異域未見其止顧雖刻有六十餘首亦
僅什一之存黔行猶家藏一冊黔寄三卷遂無從追覓
矣故今所存唯南行日記與漁洋續訂澹餘詩集四卷
四卷原無序曰暫以前集胡薛兩相國序並中丞自序
弁其端與南行日記並傳而謹誌顛末於此後之君子
論世知人未嘗不誦其詞以悲其遇而

聖天子褒勵孤忠

息綸特沛實足耀三光而徹重泉愈令人感念唏噓不
能已也時

乾隆三十有五年又五月中浣姪曾孫益厚薰沐謹識

澹餘詩集卷之一

北海曹申吉澹餘著



元日試筆

去年汶水上雪點故園春今日宛丘側風淒旅客神一
官難免俗千里自甘貧何處韶華度閒聽鳥語新

早春署中作

舊署早春還春風澹旅顏樹能傳歲古鶴亦愛官閒白
眼悲新序黃河隔故山寧知江上客更入宛丘間

偶成

日色澹芳辰庭閒及早春羣鳥饑啄樹獨鶴舞隨人雲

過寸心得風回兩眼新幾年耽吏隱猶似傲緇塵人雲
自理小齋卽事

斗齋門向夕陽開細竹幽花次第栽春色暗浮三徑雨
鳥聲閒落一庭梅攤書辨字思千古調鶴臨風日幾回
丘壑自矜隨處好陶公豈必賦歸來

仲春新月

一年幾見月此夕兩迴明晦莢催全沒東風吹又生依
簾憐影細映樹覺寒輕千古常圓缺憑誰問至精

鼠

署靜羣驕鼠微生各有求循墻終類竊稱璞轉堪羞謀

食宵偏急窺人晝出遊空憐秦相國臨羨尚悠悠

宛丘春日行

欲雨不雨春色深青青嫩草俯墻陰幾樹繁花開欲盡
一叢弱竹不成林竹影花光時映水鳥飛未動聲先起
憶向江邊怨去年却來湖上思千里湖上韶華正可憐
遶城春水盡漁船鷗鷺自隨雲上下樓臺直共水淪漣
堤上誰家新種柳裊裊游絲紛左右燕至欣逢上巳前
鶯啼已過清明後上巳清明烟色濃太皞陵畔數株松
宛丘自有西湖樂夢裏青峰三四重

清明全成洪敘飲湖上

千里巾車集友生
蘇湖亭畔水盈盈
芳辰對酒風多力
勝地尋春柳繫情
啼鳥滿園紅藥亂
蘭艘遶郭白鷗輕
當筵愧乏笙歌奏
欲倩流鶯三四聲

上巳雨中湖上作二首

夕陽微雨歇湖上
復春深花舞紅
初潤煙分綠
易沉到
門漁網集入座
嫩苔侵爲報
流鶯道知予
吏隱心
何處堪修禊
湖陰峙小亭
開門臨水閉
獨鳥隔林聽
鷺
過荒烟白波明
野岸青樂遊
歸興晚一棹
破沉冥

河北道中見山色

沙洲日暮鳥飛還
極日平原草色閒
馬上忽看蒼翠滿

望中知是百泉山

彰德道中見灌田者有感同張華平賦

我來大河北蕭然
值夏初四望皆赤土
三農望已虛
自昔愆雨澤言歷七月餘
行行漳水側乞漿聊止車
遙見兩三人抱縷出
敝廬學彼灌園術
分隴作長渠
數手共汲井終朝未盈區
挹注豈不勞聊使憂心舒
雨師顧之笑爾術誠不疎
人力斂陰陽天施姑徐徐
綠樹猶成陰中流且多魚
舊租旣已蠲天子下詔書
今年賦斂寬尚及鬻妻孥
凶年兼盜賊爾民慎安居

通許道上晚行

遠樹懸殘照平疇散晚涼禾憐新雨足麥引夏風長望
歲農開圃分蠶女執筐不堪車馬色空負野花香

河畔柳

悠悠河畔柳入夏未成陰枝葉豈不繁斧斤時相尋斧
斤丁丁聲不已新株未茂舊株死玄圭自昔告安瀾隨
山刊木理如此長堤勢共長河爭馮彝顧笑但安行濁
流濺濺鳴日夜千古常懸怨嘆聲怨嘆猶未絕歲歲金
錢竭民幸免爲魚何辭柳枝折嗚呼柳枝折還再生民
力竭寧再盈滔滔黃河何時平

庭鳥

樹樹烏棲遍人言羽族微尋巢穿葉度帶雨引雛飛啼
早憐朝景歸遲睽夕暉庭中雙鶴靜常共爾相依

謁義陵

望陵堪下拜萬載一情深鳥語長林側蟬鳴古殿陰豐
碑前代迹著草聖人心謾謾松風下如聞太始音

渡河作

好從河畔問歸程欲渡還愁風浪生故國山川時在眼
梁園詞賦若爲情雲連大陸千帆駛日照中流兩岸明
回首自憐車馬色浮名爭似一鷗輕

寧陽道中

暫喜微涼至能令暑氣清
斷虹侵雨足遠樹隱雷聲
細草村烟合殘陽堞影明
更從雲起處依約聽流鶯

途中卽事

長途百里少炊烟
荒徑孤村動客憐
幽澗靜涵人影度
斷崖高峙雨痕懸
近城雲掩峰峰日
隔水風吹樹樹蟬
更喜東來晴色好
悠然遠見泰山巔

晚行至肥城作

迢遞山城外輕涼散客塵
夕蟬飛似鳥枯樹立如人
宮病經旬臥民稀附郭貧
路昏吾已倦燈火且須親

飲衡藩廢園

帝子當年跡蓬蒿處處通
松經前代雨月照故王宮
瓦碧先秋冷花紅過眼空
笙歌無限意忍醉晚來風

東墅小集

別業蕭然暑氣清
蘭舟過處午涼生
樓臺傍水時留影
竹樹臨風半有聲
隔岸烟沉漁網急
入園苔靜鳥歌輕
閒中莫使芳尊淺
疎雨殷雷近暮城

過雄縣作

白溝存舊蹟形勝古雄關
孤戍千年沒高城一水閒
漁舟穿市過牧馬繞村還
漸覺長安近羣山杳靄間

中秋

異鄉仍令節客况復長安月影臨宵白秋陰動暮寒雲
低鴻乍度風落雨初殘何事清光滿年年只倦看

景山紀事

午夜疎風來禁苑深秋寒色上綈袍林巒幾處添新幄
侍從何人盡寶刀宛轉橋通雙闕靜慘峨塔並一峰高
醮壇唄唱聲方急太府金錢莫告勞

見賣菊

何處黃花好能令客緒寬還將籬畔意來就市中看帶
露柯常濕凌風影自寒落英如可採莫惜一尊殘

秋盡絕句

曉來霜重日痕青風勁簾開葉滿庭莫怪秋聲吹去早
蕭疎原自不堪聽

霧中趨事景山

曉色兼寒霧霏霏紫禁濃深林遙聽鶴齋殿迴聞鐘煙
靄籠千騎蒼茫辨一峰還疑垂法雨處處白雲重

冬月

京國乍寒時北風洗涼月孤蟾擁素輝昏星影半沒寂
寂鑿帷帟遥遥滿城闕曠觀四序中盈缺恒飄忽長安
羣動紛中夜不遑輟誰能睠清光幽賞恣怡悅

早行

霜飛雞未絕羣動已營營欲問緣何事相逢盡夙征天
衢原自闊君輩莫須爭曉月光如此催人不得明

偶述

舍北連宵悲舍南窮日歡悲歡倘易置人心當改觀將
歌變哭易返哭爲歌難歌哭遞相續中若環無端達人
冥一致終古常漫漫深坐感大化萬籟不能干起視星
與漢霜飛夜正寒

冬曉偶作

九衢曙色遠浮空馬跡車聲日日同永夜霜飛千戶裏
曉來寒滿一城中窮陰天地仍含雪極目雲山更度風
聞道時巡在郊甸漫疑黃帝訪崆峒

冬日閨詠四首

入夜裁縫歇背燈獨下帷非嫌刀尺冷只是怯深閨
曉起日易斜新粧不及竟長至是何時爲添一線永
雪片殷勤數爭言六出奇欲憑纖手巧團作雪猶兒
翠袖凭欄薄閒敲冰筍垂忽看梅蘂發驚是早春期
除夕前一日書所見三首

複道喧車馬相看及歲除家家頻洗戶準擬貼新符
小車不盈尺鱗鱗冰上行行人須早渡回首風波生
何處午鐘發臨湖結小菴欲將新甲子一問老瞿曇

世祖章皇帝感詞

軒帝乘龍日神堯殂落年昇平仍不改功德本相傳大
業光前史芳模啓後賢肇興周禮樂重造漢山川聖武
原無敵英材胥待甄辟雍頻駕幸虎觀必躬延水旱心
常燭圖書手自編鬼方歸版籍鯨海淨烽烟闢土非勤
遠詰戎豈好畋御衣經屢澣田稅喜時蠲每遣祥刑使
兼裁素位員網開三面祝囚縱隔年還俗比貞觀美謨
成大訓宣龍髯忽近地鸞馭儼賓仙太白何爭曜時太白晝
見者薇垣遂失權旌旗寒並舉帳殿暗猶懸雨泣千官
集霜飛片月圓小臣鮮寸補卒歲感三遷恩向卿聯渥
榮分講幄偏賜袍香滿篋遺詔痛終篇雨露留宮闕風
雲接上玄陳詩慙作者珥筆有人焉莫訝春寒急餘悲
尚在天

悼亡詩四首

病裏時時憶故鄉那堪回首念高堂旅魂如識東歸路
千里應飛到母傍
女兒十歲苦凄凄覓母時時向我啼永夜斷腸燈火暗
東風泣血子規低

風雨瀟瀟夜未闌五齡弱子泣聲寒呼兒再拜靈幃下
知爾孤魂何處看

紙灰日暮亂紛紛檢得遺裳一一焚聞道招魂別有術
箱中留取縷金裙

無題

自是情多累何來感倍增歿存途已判進退理難憑鄉
夢雲間月春風病裏燈無生如可學斟酌問山僧

何事

何事三春信今年竟杳茫寒仍憐敝帽貧且到奚囊歲
月驚萍幻才名夢蝶涼垂垂堤上柳幾度飽經霜

落落

落落長安道輕寒二月增塵飛方語雜機勝物情矜障

日初開扇衣裘早市冰非關花事晚自識旅愁凝

清明

歲歲清明常作客淒淒花柳各經春東風閒裏添雙淚
燕市愁中寄一身只有啼鶻遙度影何曾歸燕近依人
故園松柏栽新滿展眺無由欲愴神

送終

送終豈不悲欲泣神已傷如何反無淚至痛結中腸終
知有永別不謂遽分張春華方敷榮胡爲罹清霜上壽
無百年今古等彭殤一氣倏聚散生死固其常生豈戀
京闕死當歸故鄉送爾出都門四顧但茫茫青陽慘不

暉微雲曖曦光舉觴臨再莫征馬嘶路旁不知泉路遙
止念歸途長兼傷兒女別掩涕一徬徨我非漆園叟安
得中情忘人生同落葉回首各飄揚

春歸

春歸餘幾日花事負幽尋夜雨涼侵戶朝烟輕度林杯
香茶色嫩藥細杵聲沉坐惜韶光度彌清物外心

曉赴景山

凌曉趨丹籞言分勝地涼流鶯時斷續片月得微茫花
褪紅芳歇山開黛色長含情對雙闕雲樹更蒼蒼

卽事

凌晨出國門道傍足魚鳥螺生何細微隨筐任傾倒豎
子索金錢云供放生料網羅豈不勞忘機古所寶市人
競刀椎初夏日已杲死生半屈伸物命難自保在淵與
在林何如都市好

對月

晚色溶溶暖乍回停觴月下徘徊幾經圓缺光仍在
縱隔關山影自來庭樹微分清漏轉疎鐘遙度白雲開
中宵坐對渾忘寐鄉夢何由到海隈

晚晴

雨集晨光斂晴分晚照回中宵期得月昨夕憶聞雷鳥

影飛疑濕山容望或開所嗟三徑淺一半長莓苔

送子延歸里三首

五旬開幕府六載倦縉塵忽憶青山色言歸汶水濱行
藏存古道丘壑有閒身故國風烟舊蕭蕭莫厭貧
出處君同我頻年賦別離天涯兄弟少海畔稻粱肥青
眼逢人忌白頭憶主知崆峒今不返回首各凄其
灘水何清淺孤村相抱流看雲依茂樹携酒訪高丘松
菊人堪隱鱸蓴志已酬驅歌聽欲倦吾亦憶滄洲

閒中偶興

朱夏遲遲晝漏長銷閒獨倚一繩床樹分夕照蟬聲晚
簾引南風客典涼夢裏溪山堪伏枕塵中車馬恐亡羊
慵親書帙詩全廢豈是關心藥裏忙

憶昔行送綦松友侍講歸省

憶昔先皇十二春親開上苑擇儒臣南宮多士咸鱗
集問年辨姓何殷勤特許尚方給筆札詩成徧賜錦袍
新艸野忽承天子顧詔入石渠三十人就中孰是素
心者東萊綦子最瀟灑問字時時辨蝌蚪論詩往往訂
風雅執經同上講幄旃聯鑣共驅天閑馬君留秘閣我
棘卿感恩日侍銅龍下天道誰知有變更蒼梧雲暗轉
須驚攀髯莫留龍已去煉石難補天爲傾瑤池讌樂長

不返空使八駿相悲鳴離宮別殿俱寂寞輦道離離青
草生宮門經過時飲泣不用儒臣簪筆立我友再拜得
陳情高堂省覲歸須急登高頻望白雲飛到門親捧鸞
章入行旌祖帳滿都城畫錦光輝動鄰邑萊舞仍存舊
賜衣君家棣萼常依依彌觴遙羨天倫樂臥疾今知人
事非秋風未動鄉思起田園將蕪胡不歸他日逢君趨
北闕相過重肯欵柴扉

送韓貞我任稷山丞時甫自粵東歸里

萬里初歸客一官獨老身才名廿吏隱故舊識家貧汾
水魚梁少燕山雁羽頻絃歌應計日且莫嘆沉淪

乞病得請漫賦四首

京國悠悠旅病侵投閒幸遂主恩深頻開藥裹殷勤
晒漫檢書籤寂寞吟千里空憐雙鬢影三年漸冷五湖
心故園松菊埋幽逕到日西風好獨尋
憶向東籬採故薇先秋倦羽已知歸自諳林壑容疎放
敢信風塵有是非幾曲溪光留午釣一庭山色挂荷衣
浮生暫喜微名絕樵牧何妨到竹扉

幾載金門索俸錢躬耕猶近汶陽田鑑湖詔賜曾優老
廬岳懷歸祇學仙止足平生原有分拂衣丘壑不論年
聖朝頻許勞臣退若待功成恐惘然

炎蒸競逐興難窮欲覓清涼六月中莫訝青蠅喧永晝
可能白鳥耐秋風避人北海開松逕招隱南山守桂叢
多病何須游物外漫成小築且墻東

初秋留別外祖二首

自怪拙簪急天涯骨肉稀經時悲閱歷臨別戀音徽皓
首年年雪鄉山處處薇午橋渾未改竚見衰衣歸
數載相依地蒼茫別思凝秋來詩力健患過道心增出
處天難問是非理可憑應憐驅馬後回首白雲層

過桑乾作

三年三過其地

蘆溝形勝地三載屢經過雲影迷青嶂秋聲動濁河山
虜王氣近禾黍晚風多歸興偶狀遂言尋海上篆

涿州道中苦熱十韻

端居畏炎焘迢遞乃長征商風已及期驕陽氣未平方
脫京洛塵仍似逐炎行當空懸杲日亭午影彌明矯首
望園林地靜迴無聲上峙臺榭高下有池沼清中應臥
遮人翛狀聽鳥鳴念此非鄉土安能移我情澄慮却滯
囂涼暑緣心生避熱求獲湯古人篤中誠

過雄縣

何處新秋景倍妍雄關南下水如天蟬鳴就日常依柳
蝶舞迎香更採蓮雲起盡從沉鷺浦人閒欲上捕魚船

遙看百里湖光滿，欸乃聲中咽暮烟。

題獻縣署中

千里趨荒郭，紆迴度水頻。繞城惟種秫，入市不逢人。地
蟬迎客庭空草，結茵仍餘饑鼠在。足跡印床塵。

德水渡河有感二首

窮路殷勤數言歸，十日程隔河方語。異擊楫客懷平鳥
羽衝波急，蛛絲弄午晴。遂初今喜賦，舊是魯諸生。
無限臨流意，殘陽兩岸明。樓船秋浩蕩，佛閣歲崢嶸。堞
影侵帆影，蟬聲雜櫂聲。東南更極目，千里白雲平。

濟南道中

灤水年來淺，驅車更渡河。馬嘶鄉路熟，人識遠山多。石
徑穿村小，蟲吟借日和。閒聆田父語，農事歲如何。

陽丘道上卽事

濟北多憂旱，東來景物滋。禾深秋雨後，樹密晚風時。野
鳥聲皆好，農夫願不違。客懷頻卜歲，臥穩故山陴。

陽丘早發

早發征車客，夢醒遠煙靄。靄入高冥朝，陽初映嵐光。白
夜露猶懸樹杪，青幾處漚麻。依近沼誰家，刈黍釀村醪。
尚平自有名山約，巖壑於中好結亭。

過泲山舖口號

暗香風動滿湖蓮山影遙侵白鷺邊却怪向來秋水淺
灘頭時滯打魚船

青州道中

沙邊鷗鷺識歸心迎客羣飛更度林到面山容如故友
近城人語盡鄉音千年霸業荒丘在十里西風柿葉深
欲買雲門棲隱處古巖幽洞許相尋

昌樂早發二首

出戶星猶爛聞鐘夢已驚蟲聲喧夜露樹色遞虛明機
事何年息鄉心此日清更從山際見奕奕海輪生
紆迴趨石徑十里曉光分萬樹爭迎日羣峰盡出雲魚

梁臨水見雞信隔村聞何處炊烟起遙遙入早雲

續悼亡詩

熒熒青焰一燈孤細雨秋聲淚眼枯此夜爾魂應不遠
冥中知我到家無

郊行有感

荒草離離陌上行郊原鬱鬱列墳塋莫驚野外閒田少
禾黍猶兼松柏聲

秋曉卽事

素蟾晨始沒戶外澹秋容簾引曦光薄花分曉露濃書
籤留蛸積松逕任苔封漸覺塵氛遠幽居好自慵

秋分日作

秋色平分雁乍飛故園漠漠客初歸輕雲影裏催黃葉
暮杵聲中送落暉豈有林塘憑卜勝應知書帙可忘機
江邊舊羨鱸堪憶海畔新看蟹正肥

重陽前一日看菊三首

愛菊從人乞看時意倍幽移來三逕窄開後萬花收嫩
碧分朝影深黃耐晚秋繁英堪獨醉門外更何求
一齋常抱膝相對幾株閒青眼時開帙斜陽獨掩關暗
香浮蕊上秋色老籬間舊有陶潛解白衣共往還
九日明朝是頻驚閱歲華風飄千樹葉人淡一庭花映

月柯常冷依窓影半斜寒霜原可飽翠幕莫重遮

曉起

曉起濛濛雨低雲淡復橫閉門塵事減開帙道心生苔
跡經寒淺鴻聲到耳清爐香仍自撥蝶夢莫須驚

過灘水

雁陽冬淺水潺湲問渡遲遲過遠村橋畔波明鴻度影
灘邊霜重草留痕荒林寂歷藏樵火落日蕭條淡古原
何事囊沙遺戰蹟令人千載弔王孫

晚行

殘照低還斂天風吹杳茫村遙微見火月淡迴疑霜靜

夜人聲遠荒原樹色蒼更從深澗底歷歷數星光

十月晦夕雨中作

紀候宜長至窮陰暗夕暉偏聞寒雨滴故送小春歸
淅瀝兼風響蒼茫入夜微有懷仍不寐自覺柝聲稀

郊行漫興

冬深景物霽偶出臨中遠日上東南峰平野影參差
霜重林杪白宿鳥戀寒枝漠漠遠村畔茆屋炊烟遲
矯首更遐眺岡巒何逶迤道旁鬱松柏丘壠復纍纍
大造本無心哲蒙歸等夷歌哭俱不暇光景翻易馳
古人勉行樂懼為此輩嗤

入廬賤日作二首

客裏茲辰七度過投閒今得傍烟蘿
東西南北有何意今古彭殤感倍多
樂序天倫冬日煖觴開子舍朔風和
婆娑自愧斑衣舞堂上欣看髻未皤

回頭二十七年人離亂全經故國貧
敢信清時多隱逸漫嗟吾道易沉淪
蟻浮乍辨鄉中味蝶夢仍驚物外身
猶憶兒童逢此日北堂覓果任天真

北風行

建子之月多北風寒威日日凌長空
風師鬼馬不知數靈旂飄曳有無中
雙暈昨夕淡月明中宵切切聞風聲

始如錚錚戛碎玉繼如鐵馬相爭鳴怒驕午夜開窓幕
夢回更覺重衾薄亂離處處嘆無衣安用沍寒理相錯
蕭瑟平明勢益張微陽慘澹無晶光萬物當之靡不弱
飛鳥斂翼精魑藏敝裘納手冷於鐵貧家漠漠炊烟絕
閉門但苦飛埃輕亂捲簾帷硯冰結我聞海畔彗星飛
櫂槍欲動鯨鯢肥狂飈一拂海波沸鼓盪全生戰伐威
君不見王師每出疾如掃千騎夜走之罟鳥風乎風乎
胡不憑凌借勢息羣氛坐見時和冬日杲十合風味
送大舅入都省觀
人臘復孤征淒狀看此行別離千里色患難一時情月

黑南雲斷霜寒北雁鳴趨庭應計日爭肯憶諸甥猶香
述懷十韻

端居閱短晷寒雲歸暮天萬籟日以殊大造理靡愆垂
簾親楮袖圖籍紛吾前古人多精意後世誰與傳伊余
秉微尚擾擾區中緣澄志祛衆囂抱影勗貞堅文章將
建豎不朽孰後先亂離慘耳目懷抱鬱莫宜乘時貴自
奮思佩橐與鞬所志旣不遂悠悠空歲年世豈無
曾向立春後一日郊行雜述三首報
郊原寒草色昨夜已經春似得東風力萋萋欲傷人
河畔微陰合堅冰已半融青青肥麥甲宜雪不宜風

暝色結高林暮禽飛上下鬱鬱誰家坐宿草埋石馬

康熙元年元日作

曾向風塵寄一枝歸來重遇紀元時新綸競喜如天澤

時聞詔遘事仍深隔歲思治亂山中情尚切烽烟海上

靜何遲閒居自怪辛盤儉淊淊春寒罷酒卮

春陰

蕭華開裏急殘雪及春陰氣轉羣芳動寒銷萬念深蕭

條三徑雨閱歷十年心獨聽茅簷外微風送暮禽

栽松

爲愛松盈尺閒尋種樹書分泉春雨後劬土曉寒餘喬

木成高蓋新枝雜埜蔬東風好吹拂培護意何如

牟山道中卽事

雨雪春何駛荒林知幾重高低侵麥壠遠近失山容野

寺聞清梵孤村急暮春莫愁歸路晚十里任雲封

柳

弱柳絲絲拂道旁半成深碧半鴉黃故園無復將離客

一任低垂護夕陽

睡起

閒愛春風裏當階自荷鋤力慵高枕便鳥散一庭虛茶
熟疎簾外花香午夢餘遽狀成獨覺更起理殘書

二月十五日寒食

花朝此日逢寒食
令節尋芳處處同
雲影全迷新柳綠
鶯聲故點晚花紅
荒郊松柏千年恨
遲日園林一縷風
爲向樂遊原上望
春光仍在有無中

清明日雨中

寂寂清明雨
東臯氣更新
細霑花影重
亂入柳光勻
好鳥鳴何處
閒雲寄此身
况逢多難日
佳節莫言頻

雲兒就外傳有感

傳訓承宜早
出岵及六齡
猶狀憐在抱
未敢望趨庭
舉世眼全白
吾家穗舊青
何時看捉筆
相勗爾寧馨

夕行至昌樂作

驅馬臨荒邑
城低俯半陰
雲歸山色斂
風定暮光沉
樹留殘靄棲禽亂
夕音無嗟危徑逼
人世足崎嶇

拜外王父遺像志感

近覩鬚眉尚儼狀
當年頌自九重天
肖形已入商王夢
繪閣堪追漢代賢
家學儀型情倍切
毫端髣髴雪句空傳
鶴姿癯立常憂國
彷彿清風到几筵

先外王父賜像紀恩詩有毫端雙髣

雪夢裏五湖山之句

上巳日曉行

曉色遲遲度
近林鳩啼鶯語已
春深荒村自繞河流細

桼日初臨柳岸陰滿地綠雲全覆攏幾叢紅樹半依岑
投閒仍負花前約修禊空懸物外心

春盡

春盡流鶯處處聽塵中騎馬出郊坵漫尋野圃分泉脉
細數殘花辨果形飛絮近人衣更白栽松盈尺眼同青
烽烟東望無消息擬向閒園築小亭

立夏後一日臣鵠招同家兄看水月菴牡丹至則
花事零落唯餘數枝頽狀欲墮而已因憶歲在
甲午讀書臣鵠別業曾爲寺僧賦牡丹一律荏
苒之頃已過十年由今追昔不覺三歎復歸臣

鵠齋頭小飲卽事賦懷十六韻

爲赴看花約言尋古梵宮紆迴來別院寂寞對芳叢香
艷空留影繁華不耐風爐烟寒磬外僧語石橋東往事
疑飛電浮生類轉蓬塵囂三徑絕踪跡十年同閱世悲
青眼題詩愧碧籠勝遊翻可續逸興渺難窮柳絮時相
引花源到卽通入門依短榻留客問新筒酬答形全略
懽歌志尚童桼蔬侵戶牖高樹映簾櫳解語梁間燕冥
心海上鴻憂危千里內懷抱一杯中望歲情仍切謀生
術未工春光何處覓矯首夕陽紅

三月晦日遊東墅有感

東墅先外
王父別業也

遲日園林獨愴神勝遊曾憶昔年頻
鸞啼金谷悲時序
驚過平泉少主人
遶砌苔生經雨潤
隔河麥秀受風勻
名葩開落紛何事
徒倚高樓送晚春

過營丘作

營丘古營陵地乃杞子遷國於此非齊始封之營丘也

營陵亦是春秋地
廢堞蒼涼對遠峰
霸業有人遷杞社
荒城無據說齊封
雲迷古驛村烟絕
麥秀清陰蝶影重
坏土路旁稱漢隱
千年誰復繼高蹤

逢萌墓在道左

蠶多桑盡聞有瘞蠶土中者作春蠶怨

養蠶苦不多蠶多桑葉稀
葉稀猶自可時復空筐歸

解一

歸來見蠶饑對蠶寂無語
餅中數升粟不堪持飼汝

解二

主婦怨春蠶胡不生雙翅
不見滿園蝴蝶飛
艸間栩栩

無人餒

解三

主人自外來呼婦首常俛
今年絲貴官租急

願蠶忍饑且成繭

解四

春蠶怨主人爾貧何相迫
我聞亦有朱門客

練車不動常衣帛

解五

陌上桑既盡餅中粟亦

無人蠶相對饑空腹兩躊躇

解六

主婦同主翁長跪謝天

蟲未忍相看死狼籍不若汝先歸
土中

解七

呼兒助舉筐

瘞蠶桑樹側徘徊不能去
婦子淚沾臆

解八

日長困臥時

鄰家聞繰絲回念二三月力盡
為阿誰

解九

乘時速植桑

滿籠沿門更乞來年種
待得桑葉再生時
攜筐一上春

蠶塚

解十

五月朔日作

晴色開朱夏閒堦草自生
鳥翻朝景細露泫曉枝輕
市近塵仍隔時和夢不驚
無嫌榴火艷偏照眼中明
雨餘蟬影薄應候發微陰
羣飲分朝露孤飛託北林
閒鳴人自賞偶化物何心
若使聲俱寂高踪歎莫尋

過臣鵠別業

投閒何處咏滄浪勝業頻來似辟疆
鳩羽暗啼三徑雨花陰深護一庭涼
當門漠漠雲垂笠遶舍青青竹拂墻
避暑不須河朔飲疎簾自引午風長

苦熱十韻

養拙幸投閒杜門畏炎熇永晝竟何營
卷帙媚幽獨近午目力昏開函不能讀
旣祛酬應繁復免緇塵逐高枕自科頭
短榻容坦腹流雲時覆庭微風乍動竹
綠陰豈必多當簾欣卽目側聞歲事豐
願飽餽與粥寧不覲西成
愬閱流光速旭陽慎莫驕窮陰潛已伏

夏夕獨酌二首

晚色清炎熇閒情謝鄙氛樓低堪聽雨
樹遠迴疑雲戍鼓荒城急蟬聲靜夜聞
開尊渾不厭且莫惜微醺
皓月寧無彩浮雲亦有涯時清容臥病
徑僻可栽花門

謝翟公署途廻阮子車仍聞微雨息深沼一鳴蛙

同劉子延魏樸菴小集東墅二首

入門增墊興煩暑暫能忘度水閒雲濕依風翠竹涼苔
露容履短松老藉陰長逞蹟何堪問相期醉夕陽
小樓聊極目溪畔復濛濛鳥散閒園雨涼分野岸風徘徊
山影近俯仰客懷同歸路何辭晚遙空挂斷虹

立秋後一日作

序初從一夜分西風輕度散微薰雨中蟬語移商律
山光接夏雲漫向槐陰窺蟻陣何如海上狎鷗羣
時深護蒼苔色忍使堦前屐齒紛

秋海棠

西風昨夜急弱卉復經秋名偶同春艷枝仍類草柔入
簾香竝寂抱砌影偏幽持比金閨秀盈盈未足羞

初八日獨坐成咏

池影成蕭寂微涼淡夕煙亂蛩秋雨後獨樹晚風前綠
入莓苔接青分薜荔懸填橋昨日事銀漢憶娟娟

賦得萬戶擣衣聲

商節初移律輕砧已滿城背人收篋笥結伴向簷楹月
照高低影風吹斷續聲夜涼深帶露苔靜亂飛螢細草
時侵袂寒蠶更助鳴哀音隨腕歇遺響繞堦清遠塞書

難度空閨夢易驚忽聞何處雁還動去年情

賦得秋夜長

秋夜長樂未央主人鳴珂出建章車騎紛紛歸衛霍樓
臺處處識金張朱門日暮調鸚鵡繡簾高捲簷花吐門
前上客解逢迎閣內妖姬能歌舞妙舞清歌徹綺筵博
山香裊半沉煙錦堂帳煖延秋月重幕雲遮不曉天醉
裏寧知容鬢老罇前萬事何草草鴉啼簾外露華濃蛩
唵樹底霜飛早繁華千載易銷沉寂寂涼生北舍陰隣
家亦有高眠客月明夜夜獨聞砧

觀灘水

長川如鏡碧潏潏浪逐西風秋色繁殘照入波斜見影
亂雲依岸半留痕舸輕細細魚鱗動樹遠青青鳥羽翻
更欲乘槎問河漢孤村烟火易黃昏

秋感八韻

秋半陰常積低雲行復遲昨夕景寥廓已覺動微颺入
夜響颼颼風雨聲互隨涼序豈相逼寒燠各乘時曉起
天宇淨堦畔莓苔滋短樹當長風弱葉辭故枝物生貴
有託墻頭草先萎寧待霜霰零始知秋氣悲

雨中自檢舊業二首

搖落秋光細雨中一編嘯咏復誰同敢期事業年偕進

漫信文章晚益工筆墨隨緣耽病骨繁華過眼耐西風
由來丘壑從人好更對寒花寂寞紅

從來著述愛名山舊業頻勞手自刪應識雕蟲難媚俗
終知覆甌且銷閒風詩世歎微言絕騷雅人期正始還
千古必傳寧有幾虛窗獨聽雨潺潺

閒居忽憶濰水之游

爲憶曾游處煙波返照同水侵韓信壩雲滿蓋公山客
至同垂釣歸來但閉關何時乘小艇常逐埜鷗閒

張起元爲篆印章走筆贈之

古今字體凡幾變商周邈矣稱難見斑駁猶傳鐘鼎銘
昔人精意存如綫篆法源從秦相斯典型獨有嶧山碑
大篆小篆由心造丞相獄吏幸同時漢季一傳體破碎
八分隸法互參差崔駰梁鵠工體勢風流千載相追隨
古人字簡乏雕飾書契公私同一式奧質深心難久傳
楷隸常存古篆息陽冰以後學者稀科斗滿眼無人識
風規猶得見圖章時從腕底窺筆力印譜紛紛世競高
字形雅俗爭分毫古印唯傳銅與玉鑄法全借昆吾刀
後來纂緝匪一格師古聰明矜創獲水晶琥珀鬪奢華
今人獨重青田石玩弄佳石尋舊篆名流往往愛成癖
先朝絕技誰最工壽承雪漁聲籍籍吾友嗜古真絕倫

六書考校志艱辛日摹篆體筆成塚舉眼直欲窺先秦
閒中贈我雙小印經營字畫骨肉勻步趨於中生變化
古韻幽光良可珍吁嗟乎世手俗媚何足數攀彭頡震
古爲伍海內希傳三代器惟有岐陽舊石鼓駁蝕風雨
經歲年點畫猶堪作篆祖多君胸中羅祕書我欲從君
問千古

九日晴甚因憶忤庭松友諸子二首

秋盡多風雨欣看九日晴雁低池畔影峰細菊中聲
潦倒遲新釀登臨憶舊盟無勞驚剝啄終歲少逢迎
言歸曾幾月兩度晚秋時白眼人同病青山事不疑
力慵常脫帽菊老任欹籬何日東臯外壺觴手共持

曉行郊外

九月西風散杳茫郊原曙色轉蒼蒼秋山一抹雲全白
茅屋千家草半黃宿鳥乍啼聲戀月征鴻遙起背霑霜
何人寂寞耽幽興薜荔青青更結裳

秋盡

秋盡夕煙裏空階細雨侵深杯寒夜影殘菊故鄉心漏
永燈仍續城低柝欲沉邇來懷抱穩欹枕復長吟

聞雁

寒色纔深一夜中霜華未散曉光紅不知旅雁緣何事

早起羣呼背朔風

寒夕

更覺陽光迫空庭樹影枯日斜寒自照鳥倦暮相呼
覓藥囊頻減微詩硯半蕪吾廬良足愛殘菊對潛夫

澹餘詩集卷之一

澹餘詩集卷之二

北海曹申吉澹餘著

曉行山中

早起羣山入望中煙嵐深處徑纔通雲聯雁度千村曉
馬帶霜寒十里風晴色乍開峰近遠泉聲遙隔樹玲瓏
何年蠲屐扶筇去沂嶺丹楓興不窮

冬日喜晴柬臣鵠

晝短晴猶適當簷負午喧竹寒殘雪護身落弱枝翻白
眼寬書課青山減凍痕倘來求仲迹炙背願同溫

途中絕句

雲白山低萬樹清
荒邨幾縷午烟明
孤鴻遙起垂垂雪
疑是雲林墨染成

過開山作

循山一逕曉氤氳
寒色凌空破碧氛
寂寂雁鴻霜外度
青青城郭望中分
斷崖半隱林間雪
層嶺遙通海上雲
西北更窮千里目
荒煙無際客思紛

雪後行洱水道中

大陸層陰澹夕暉
雪光搖漾日光微
亂雲古道瑤華滿
淺艸平原獵騎歸
陌上烏鴉啼樹切
橋邊流急帶冰稀
遙遙更聽茅簷外
冷絕雞聲出板扉

冬寒

忽忽冬將半
臨風歎索居
貧容妻子病
寒覺友朋疎
問字誰耽酒
歸田懶著書
朝來煙火起
傲殺釜生魚

歲暮偶作

曉來日淡一庭虛
景色蕭肱逼歲除
任懶自能荒筆札
忘機端可狎禽魚
家無長物書猶富
門少雜賓事更疎
避地何人堪共隱
閒中真擬子雲居

野望

萬木寒聲裏
孤村野水邊
日斜牛背赤
風逆馬毛殘
雪明欹岸饑鳥噪
暮田歲窮何足惜
春柳已含煙

五日見新月

乍見初弦月清輝已滿城風含千里暈春入一鈎輕不受微雲掩何須永夜明相期元夕近莫厭鼓歌聲

八日遊牟山寺見壁上舊題乃予甲午夏作也感

賦四韻

八日春光倦眼舒舊遊重續十年餘磬聲自愛因風遠僧定應知出院疎三逕松篁當戶老一村樵牧下山徐結廬若得依蓮社靜對高峰學著書

夢與舊館中諸年丈泛舟西湖

時元夕前三日

平生不識西湖面春夕言從夢裏過乍接山川青眼闊

何來江海故人多一舟載酒輕煙水千里同心問薜蘿

枕上忽驚窗雪響臥遊重溯竟如何

閨詞

上元纔過日初長風動簾開一縷香欲種梅花寒尚怯閒調鸚鵡不成妝

曉起

曉起蒼茫裏春光漸不同凍開雲隙日鳥散樹頭風爨急煙平屋天低霧隱櫳漫嗟花事晚踪跡正愁中

拜外高大父墓

時兩舅滯都門予代修祀事

獨拜東風裏還思世澤殊百年坏土在四代兩孫孤隴

畔松聲老墳邊艸色枯殘碑讀更拭得似魏舒無
感興
殘日未西匿淡月已東吐循環固其常此事竟終古夸
父乃好勞逐影爭馳騫志士惜流光達人安厥素任運
與之游春風隨所遇得失遞晦明寒燠等朝暮老氏戒
機深懼爲蜉蝣誤翔羽及潛鱗舉世誰能數

微雨

微雨午仍霽蓬門客到疎屐聲驚樹鳥花影駭盆魚諧
世慙莊列全生學櫟樗盤飡貧更減日摘埜田蔬

清明柳枝詞十首

依依柳色復清明蹀躞乘春到處行欲折一枝無可寄
游絲深鎖乍啼鶯

杖藜常逐埜雲閒青草橋邊綠一灣獨怪垂楊千萬縷
半遮遊女半遮山

山頭斜望繡成堆多少殘紅點碧苔逢着盡乘珠勒馬
無人不道踏青來

游人何處語喃喃油壁輕車擁半巖欲鬪枝頭芳杏色
臨風全着淡紅衫

愛坐芳茵近樹涼佯羞故弄柳枝長鞦韆閒却無人上
悵殺堤邊游冶郎

千村艸色遠萋萋山畔平疇間麥畦解得提壺聲最切
芒屨齊過小橋西
幾曲河干盡杏花數枝深映竹籬斜吾州從事原堪侶
爛熳風光不用賒
小園臨水復依山寂寂柴扉鎮日關醉裏滄浪歌一曲
沙邊鷗鷺傲人間
近村催喚打魚人網挂柔枝綠未勻乘興須凭高處望
畫樓對面是長津
竹樹高低礙鳥飛東臯極目遍芳菲漫尋嫩蕊垂垂發
更對殘陽緩緩歸

讀弇州集四首

銷閒憑一帙紙上見生平何事千秋業徒高七子名蒼
茫司寇筆寄託少陵情二美心全折誰云此道輕
爲溯嘉隆際弇山孰與儔盛名人自如大雅爾何憂好
客開三徑冥心問十洲濟南風格峻真不忝同遊
北地誰堪嗣婁東此再振詩源薄大曆文箴指先秦禹
穴書全出蘭臺志夫伸一朝虛信史老却五湖身
調大難爲學真源尚可尋終年營筆札半世老山林獨
樹中原幟常懷國士心寥寥百載下應不廢知音

題子延畫像四絕句

望裏鬚眉活丹青若有神雲臺今已杳且伴五湖春
已適山林興寧嗟遲暮心何來雙髻雪應憶

主恩深

雄圖今寂寞豸繡日光輝更握中丞節還堪壯國威
持懸金屋內相對意偏長雙影臨粧鏡低徊錯問郎

芍藥

露浥明霞冉冉新名葩爛熳殿芳春開遲應避天香艷
光滿常分午照勻楊氏傾城羞近侍陳家結綺想前身
風流漫逐韶華盡消上何妨折贈頻

雨後晚行二首

雨歇疎林外歸雲亂夕煙鳥聲依近樹人影滿前川衣
薄微涼入村遙暮火懸喜看東上月新沐對嬋娟

汶水乘昏渡微茫識遠汀麥光浮近壠魚影接新萍月
挂千村白雲垂四野青農桑田父語蓬戶未全局

賦得良苗亦懷新

道旁何離離良疇紛左右稂莠暨禾黍天施均所受力
田貴荷鋤區別人力厚匪類既就刪嘉種乃挺秀入夏
欣景風披拂如相就兼承雨露滋鬱勃何其驟油狀思
結實生意豈同舊農夫願易奢已擬倉箱富翻笑舌耕
儒石田終不售

擬李義山咏燈八韻

燈火近屏張流輝入曲房風低帷半啓香聚袂初揚皎
潔依新月微茫借晚粧頻移簾影動時背篋文涼暗祝
疑雙燄伴羞進一觴綺筵雜燭淚深戶映珠光結子憐
歡劇藏煤拂黛長短檠何用棄曾照讀書堂

午日集飲東臯河上登王氏小樓四眺甚適

朱明端合醉滄洲選勝還從韋曲游十里煙霞頻載酒
百年慷慨幾登樓風聲乍拂深林迴波影遙分夕照浮
指點河干虛眺望何時凭舸泛中流

夏雲

夏雲吹每散敝綌借微涼橐筆遵時禁休糧憶古方旱
憐山地瘦貧覺海天長不盡滄浪興臨風詎可忘

草廬

二載緇塵到眼疎日長高枕起徐徐投閒肯待車生耳
索米何嘗食有魚豈爲耽玄疲執戟翻因種秫學操鋤
較晴量雨尋常事五月涼風入草廬

茉莉

素蓋亭亭南國香半開依約待昏黃摘來月下朦朧影
簪向風前髮鬢妝

梔子

天際傳來六出姿，隔簾風動暗香隨。
漫誇玉楮三年巧，應自唐昌觀裏移。

小築

小築開三徑，幽棲寄一枝。
爲農逢儉歲，多病負清時。
灌樹泉頻引，看雲席屢移。
科頭隨野圃，更欲向東菑。

喜雨

夏來不雨四十日，火雲滿眼勢蕭瑟。
爲憶前宵陰氣濃，雨聲坐聽愁全失。
旣雨五日晴未開，貧家婦子轉啾唧。
牽茅補屋難防漏，比隣不見炊煙出。
田家憂喜亦何常，較晴量雨無時畢。
卽今刈麥已登場，繰車不斷絲成匹。
東畝種豆已及期，禾黍油油齊結實。
安得穀賤不傷農，年豐寧煩時賑卹。
願言普天賦斂寬，袖手空齋常橐筆。

長夏聊爲短咏

荒草滿庭閒日午，薜荔花落聲如雨。
樹外流蟬斷續吟，簷前弱鳥參差語。
六月衡門白晝長，蕭然欹枕傲羲皇。
披髮更向林中去，臥看浮雲西北翔。

栽蕉

映水青三尺，當簾綠一叢。
心舒仍帶雨，葉聚漫搖風。
未覺秋聲恨，翻憐鹿夢空。
無情蔽萱草，彈事莫相攻。

夏日登樓有眺，忽得忤庭盧源手札見詢，率爾寄

懷

長夏蕭然跡倍幽何曾百尺也稱樓遙空急電穿林過
絕岫驚雲抱日浮千里懷人勞雁鯉三年閉戶失羊求
開緘竝有涼風發如爾雙棲濟水頭

詠竝蒂蓮

共抱亭亭質偕生曲沼中含香雙就日聯袂競迎風葉
影侵波綠花光入鏡紅傾城堪竝倚姊妹趙家同

題管幼安濯足圖

我聞古達流潔身常比玉洗耳有流風幼安繼高躅皂
帽復歸來悠然淡所欲舉足置河干不隨世彳亍滄浪
豈必清鳥履難甘俗棄金本無心臨水偶狀浴大中辭
若免桐江釣堪續馳驚趾過勞鼎峙祚亦促嗤彼華太
尉投足分榮辱

玉簪花

湛湛迎秋早娟娟帶露寒粉深難辨蝶香滿欲窺欄素
質依蟬鬢清心傍籜冠倘憑纖手摘置向玉盤看

立秋後十日大熱有作

是夜月食

不信秋能早翻疑暑未歸炎暉銷永晝白帝失清威統
扇時難棄蒼蠅晚更飛夜深聞月食搔首願多違

哭周戒存姨丈二十二韻

予年未三十親知每淪替忍見秋風起復此凋蘭蕙
翩周長公弱歲工文藝艱難乃備嘗不徒恃家世明經
應殊科六翮無留滯從母秉柔順相夫稱婉孌玉潤少
傳門予忝宅相睇骨肉旣言歡筆研兼投契憶昔聯榻
時行誼必共勵季方號最賢顧我論兄弟松柏豈不高
蔦蘿得相締善病動經年不受藥餌殫詎意鵬鳥來未
及龍蛇歲誰言玉樓成坐傷哲人逝君無買誼年予下
元規涕臨弔獨彷徨一燈黯分翳几筵空在陳涼颼吹
短總庭除客猶舊主人已臨祭司農騎箕遄四載典刑
蔽泉下復趨庭天倫不相離更從少傅遊翩狀謁上帝

天問竟如何千古斯文閉

又

浙浙秋風總帳前青氈舊業倩誰傳一家骨肉餘孤第

三世飄零僅五年

司農公歿於己亥太翁歿於辛丑君歿於癸卯

湘水鵬來空

作賦緱山鶴去總疑仙修文若憶人間事肯聽招魂宋

玉篇

張仲威自海上赴都謁選便道過訪賦贈一首

日向空齋理濁醪忽傳張仲過蓬蒿文携大海濤聲壯
馬逐青山雁影高藥餌秋風扶短髻薜蘿寒色上綈袍
知君才自兼清要能使山公啓事勞

秋深

地僻荒城畔秋深落木前
暗生三徑雨涼聚一庭煙
苔影侵堦濕蕉聲入夢懸
閒中耽臥疾踪跡類逃禪

喜晴

積潦憂堪破涼風淡夕曛
寒峰飛就日饑鶻掠穿雲
指點琴書濕綢繆僮僕分
仍愁聲淅瀝更向夜深聞

賦得霜葉紅於二月花

五里河道中作

一片楓林色迎霜更作妍
祇緣風景異翻訝歲時遷
春艷難爲敵秋煙半欲懸
唯餘河畔草青白自年年

讀止一從外祖南遊諸作賦贈

多君文采足翩翩吳越翱翔動隔年
得句時乘天竺月懷歸早趁建康船
西風吹客思千里南土依人賦幾篇
何事登壇推宿望還從行裏識幽燕

以琉璃瓶貯小朱魚

貯爾光明域寧忘勺水功
影翻疑就日甲動漫乘風入
眼滄桑幻容身湖海同無煩驚釣餌
色界已成空

讀王阮亭見寄新刻率爾寄懷二首

翹首雲霄振羽翰知君骨節本珊珊
廣陵調絕音仍續隋苑情深月自寒
江上秋風吹雁鯉故人佳句重琅玕
盛名海內論交滿游子誰歌行路難

憶爾清標邗水頭何如杜牧在揚州懷中蘭芷三湘色
望裏金焦一帶秋賦就江南人澹蕩書來淮北事風流
相逢如責元龍禮把酒還登百尺樓

曉行七里河道中作

寒色凌晨動荒村更一過埜風吹古堞旭日照冰河艸
短山容淡霜明雁跡多邇來耽逸興結想睠丘阿

咏瓶梅一絕

已絕根株累還存色相疑清芬何處遠雪夜夢醒時
寒輝上人覓大藏功成詩以贈之

彌天乘筏往惠遠渡江回疑共浮雲住重逢白馬來禪
心雙樹老慧業一燈開聖域光無極還應耐劫灰

除夕

三十明朝是韶光一半催柳風吹律轉梅蕊隔年開理
亂憑誰問行藏只自猜今宵雙鬢影空照掌中杯

三日對庭中積雪作

寒隨春色動殘雪覆空庭雲影千家白炊煙一線青擁
梅垂素浪鬪茗敵中冷何處尋鴻跡飛飛入杳冥

送家兄領解北上

齊魯諸生羨獨賢吾家世業一經傳秋風健翮三千里
小弟先鞭十二年棣萼有枝聯上苑菁葱能賦奏甘泉

瀛洲春草如相夢舊跡重尋鳳沼邊

立春日晚行玉噶道中

故國復行役東風吹不禁餘寒天外暝殘照雪中深不
盡冰生岸初茲月隔林轉憐時序迫空有住山心

上元前三日儉菴內兄齋集飲極歡賦雪月行紀

事兼以言別

正月十日東風發我行獨踏千山雪入門握手及黃昏
素月依簷何皎潔主人喜我百里來舊醉新釀參差開
左手持觥右持麈清言拂拂絕氛埃酒酣雜坐更籌急
君家一門皆玉立積雪當庭月當午開簾竝照光華入

綺筵銀燭雜星河堂中徵舞復徵歌韶華忽訝傳相近
骨肉還看樂事多角戶論心樂未已火樹紛綸疑蜃市
方散蓮花匝地飛俄驚珠彈當天起煙霧氤氳半欲醒
繁華過眼風泠泠何羨魚龍稱秘戲須臾散盡還空庭
相逢與爾開懷抱兄弟投閒俱未老興闌且就月中眠
明日重尋雪中道

月食

月食曾何意中元及上元不眠驚鼓角有恨任乾坤圓
魄恒招忌清光只暫昏修刑臣職忝踪跡已柴門

二月六日雪

雜雨霑三徑流雲濕萬家飛空仍有片落地已無花遠
樹風枝動饑鳥暮景斜何如袁處士高臥度年華

遙哭宛委胡夫子二十四韻

忽有燕中信開緘淚泫狀獲麟悲往聖埋玉痛前賢絳
帳三秋別緇塵一旦捐名高天抑損寵絕數迤邐夫子
登朝日

尤皇御極年鴻文珠錯落弱歲玉翩颺銀管矜殊錫冰銜

訝屢遷晝聞袍賜錦宵直炬生蓮密勿叅綸席崇班冠
講筵鸞臺勤眎草虎觀日橫編校士歐陽鑑傳經泗上
瓊艱投盤錯理公曾攝冢宰司農事遠使膚功宣公嘗使長沙迎義王來歸魚

水欣同契舉夔許竝肩道亨千載合

帝眷百僚前保傅宮臣重裴王朗照全

公為太子少保吏部左侍郎以病請

先憂心倍切退食疾猶纏元老躬初臥蒼生望正懸龍
蛇乘歲序松柏失貞堅楹夢俄成識鵬悲剩有篇五齡
兒泣掌萬恨事歸泉舉世德誰盛如公命不延及門慙
瓦礫早達荷陶甄仍負侯芭志徒懷京兆阡何能親執
紼流涕舊山邊

課僮僕栽樹畢雷雨適至即景有作

樹影參差春半催數株移傍短墻隈林陰忽散花朝雨
天際俄驚起蟄雷荒徑牛隨孤笠動疎籬門向遠山開

朝來更度閒園色鳥跡先應破綠苔

途中苦寒

客路寒威逼當春失午暄山光催黯淡雲影倏晴昏
草白含霜氣林青辨雪痕敢言裘已敝終是戀餘溫

淮水道中觀落日作

夕陽天外盡十里兩通津雲影分餘照河流映半輪
含精勞出沒斂魄讓星辰無數晴鴉集翻飛色更新

堃行

煙中桃李望中深雨後遙遙隔碧岑騎馬細隨花片去
武陵原不在幽尋

吾志

寒度閒堃色春深戀縵袍莓痕經雨重柳影帶烟高
近樹樺聲急尋芳屐齒勞無煩驚小草吾志尚蓬蒿

堃前鑿小池丈許閒中成詠

丘壑常存萬事情盈盈尺水待人工庭閒鳥過時留影
日淡魚浮半啜空綠色靜涵三逕草清光涼聚一池風
忘機坐愛新荷長夕照偏宜摘碧筒

立夏後一日曉行有感

曙色臨郊闕韶華入夏新煙低槐影暗野曠麥光勻
濁酒生涯穩浮雲聚散頻堃東倘可住遠志敢求伸

曉步池上作

空庭一夜暗苔生積雨能催曉氣清
出水荷錢侵岸碧繞堦榴火入波明
簾間風細爐香影檻外雲涼藥杵聲
把酒攤書吾竝懶惟餘欹枕與閒行

夏夕言懷

仲夏庭艸蕃殘照明如線日長尚歎速
流光不及眇月淡池水昏風回樹影轉
荷上亂珠明魚跳驚波濺睠此暮氣清
寧知夕露滋感時心已違開帙目先倦
俗異迂爲累道窮身足患豈如任優游
流坎隨所便世網孰不嬰緇塵吾屢踐
十畝願易盈三徑翻堪戀踟躕坐夜分
河漢光猶絢薰風吹敞帷高枕起當晏

雨後野行觀農事二首

曉涼隨步屨曲折徑纔通山界陰晴日
林含遠近風沙痕平野外石影亂流中
村巷聞農卜豐年兆屢同處處歡新雨
耕鋤總及期室家偕瘁日場圃暫盈時
泉活分長隴烟生隔短籬老農如可學
南畝永相隨

池旁植紫薇一本旬日遂能盛開漫成四韻

怪爾花開早盈盈百子叢荷光侵葉碧
霞影入波紅曉露金莖似佳名玉署同
繁華仍耐久應不怯西風

閏六月七日戲成一絕

應有天孫怨何勞紀閏年渡河期更遠悵望不成眠

出門後漫作志感

離家却憶昔歸時埜水秋風任所之敢向鷺鷥商出處
終慙丘壑負心期園松徑菊存幽性池草庭萱足夢思
不待移文謝逋客山中雲影已相疑

青州懷古

山河十二古營丘旅客偏宜選勝游澗水暗流齊苑曉
雲門涼照范亭秋談經舊俗推儒雅技擊遺風覓蒯緱
莫問爽鳩千載事牛山涕淚已全收

途中見流移者

家具一肩輕逢人問去程兒依殘篋坐犬負敝箕行婦
子提携切饑寒骨肉并遥遥何所止嗟爾太平氓

濟上晤怍庭翁菴兩同年把酒言懷率爾賦贈

良朋三載別握手各悲歡濁酒逢迎拙浮生出處難秋
風吹髻短山影落杯殘仍作丘園計從人小艸看

雨中祖龍淵制府召飲釣哭泉卽事四韻

秋陪樽俎共登臨疎雨全催暑氣沉千尺濤聲侵座冷
四圍峰影入杯深雲生綺席含清嘯風動珠泉響暮陰
回首鹿門慙舊隱看山空有薜蘿心

周彝初中丞召飲漱雪亭同孫怍庭伊翁菴

澹蕩荷香入素秋平原十日爲君留玉堂舊約人偕集
金谷遺風客勝游猿鶴閒時千嶂杳鷺鷗深處一舟浮
尊前共聽明湖雨城郭煙光薄暮收風健寒泉響暮
過阜城數十里值河水泛決通達皆成巨浸乘小
艇行二十里始登陸是日適風雨大至卽景二
首
楚水乘秋濶馮夷蹴浪多高低通巨漲風雨暗長河草
沒烟生岸舟分鷺起波更聞雷隱隱滿地覓漁簑
年年衡水決七月浪深時潮逐魚龍怒秋生禾稼悲雨
涼帆影重風逆棹聲遲曾識麻姑語桑田會有期

出獻縣復登小舟行二十里作

荒城南北水連空三載重過歎轉蓬高下波光茅屋外
送來帆影荻花中雲聯瀛海千層浪日淡滹沱兩岸風
多少輕鷗隨小艇何如江畔問漁翁

過趙北口

秋煙如帶繞堤生菱葉菱花映水明却怪青鯢波上立
空憐白鳥鏡中行清陰自逐微颺動夕照頻移小舫輕
極目滄洲堪嘯咏回頭應憶棹歌聲

再用前韻

征塵日日逐愁生乍接湖光眼倍明幾處柳陰垂網坐

何人晴日負簑行
婦持蘭棹凌波穩
兒倚危欄弄釣輕
聞說江南風景似
鳴榔高送遠秋聲

曉出涿州渡河作

城邊流水曉淙淙
閱盡風塵客子容
漠漠秋埃迷涿鹿
瞳瞳野日射朱龍
浮生襍穢惟存拙
舊跡蕭疎自悔慵
北望晴巒天尺五
閒雲空鎖最高峰

秋曉聞砧

幾處驚棲鳥涼生戶外砧
雲低孤影暗風細數聲沉
入耳兼蛩響關心耐病吟
授衣何足訝憐是異鄉音

過望石園亭

小築龍門峻同人永日登
秋煙青兩岸野水碧千層
良會時時愜幽懷歷歷增
何如滄海上把手問漁翁

霜降行

吾鄉四月霜飛急殺麥驚傳三十邑
又聞六月霜再飛
田家父子中宵泣魯史紀災多歲年茫茫天道憑誰識
却訝長安節候殊飛霜正值霜降日我來自東千餘里
畿南苦旱畿北水蝗飛常傍黃河邊雨雹秋傷禾半死
年來穀賤太妨農役頻賦急苦年豐豈知歲歉穀復賤
王師芻粟孰能供君不見聞天德意徠羣醜荆楚逆渠
今授首黔南竝罷水西兵災異不書書大有

秋暮

為客逢秋暮寒侵旅思繁
疎風欺墊雀敗葉擁頽垣
地迴人煙薄天高吏隱尊
途窮今日事養拙復何言
奉答家兄寄懷之作
風吹霜樹一庭遮
羈旅還同汶水涯
愁裏厭聽烏嘴大
閒中空羨雁行斜
夢迴池草聞尋句
別後家園憶食瓜
客久更知兄弟好
悔將離恨度年華

志痛

腸斷遙空見塞鴻
新秋一別恨無窮
忍將骨肉千行淚
來對長安雪後風

紀夢

寒生千里夢魂孤
鄉路依稀辨有無
永夜乍醒何處是
月明霜樹聽啼鳥

友人見貽梅花一本時已盛開感賦

何意塵中久猶逢
世外姿靜涵天地
力開傲雪霜時寂
冥香逾遠孤貞性
不移陽和知漸近
留待兩三枝

閉門

駒隙寒隨一線長
中庭霜色辨微茫
遙空山意含雲白
大漠風聲擁日黃
帙靜已從殘蠹老
爐閒翻覺敝裘涼
閉門踪跡堪充隱
京國寧嗟是異鄉

晚晴眺西山作

西來萬疊矗晴峰夕照平遮暮色重天半自聯雲上下
塵中常對樹龍從烟嵐倒影懸燕市形勝凌空鎖居庸
時序漸窮寒漸切何當絕頂一扶筇

歲暮作家書畢悵狀有懷却寄家兄時立春三日
矣

寂寂京華復見春歲窮飛雪倦游人天涯踪跡經三季
故國音書隔數旬自訝寒來唯伏枕每憑使去一傷神
鵲鴿南北鳴何意回首煙霞笑此身

除前一日奉寬大舅之作

卜居常傍帝城東年少那堪逐轉蓬浮世何人非遠
客閒門無處不春風天邊樓闕參差碧海畔雲霞想像
紅骨肉異鄉仍在眼好將尊酒慰途窮

除夕

十載長安舊重來復歲除人新恩原自濶往事不嫌疎
濁酒天涯味春風物外書星河看漸轉雙鬢欲焉如

早春過天寧寺作

春光五日望中明客思還從郭畔生山引晴雲遙度闕
塔分夕照半侵城松杉覆院兼香影鈴鐸臨風雜鳥聲
乘興欲窮人境外峰巒無際野煙橫

題望石亭子

幽折時來逞尊開破旅顏雲歸春館
暝月淡水亭閒綠入煙中遠青從柳外還
行當乘小艇共泛蓼花間
上元前一日望石名同人讌集一首

令節天涯合韶光勝地偏依簾冰上月拂袂竹邊煙火
樹驚魚窟空花結蜃緣同人歡永夜皓魄自年年

上元入朝

涼入春宵淑氣勻風回閭闔望偏新雲中尚隱千重嶂
陌上初飛一半塵星影乍稀燈錯落月華微動闕嶙峋
平明拜舞爐香下多少晴煙覆紫宸

春分日雪二首

帝城春已半乍見雪花新暗濕鴉巢重輕露雁背勻映
梅枝帶暖近柳絮疑真曉望蒼茫處雲山更可親
春曉庭餘雪遙空已半晴稍憐窗有影却憶夜無聲雲
薄侵堦濕風低拂樹輕上林花欲放寒勒減芳情

過西苑有感

上苑此重來一片荒春色百草綠已萌寒勒翻無力塔
影俯橋陰松聲響殿側一水繞宮牆嗚咽流不息轟轟
景山雲斜照入波黑瀛臺今寂寞猶帶翠華迹羸馬昔
頻過長嘶如曾識况我執經人感歎情何極

漫興

長安春事漫飄零，客思昏昏未易醒。
花色聊從籠裏見，鳥聲祇向市中聽。
塵侵鬢影疑生白，雲掩山光不辨青。
却憶故園芳草滿，鶯啼寂寂水東亭。

飲張螺浮新齋賦贈二首

危構臨芳岸，閒門帶晚霞。
倦鶯眠柳影，瘦鶴啄梨花。
樓倚長河直，窗聯遠岫斜。
清歌催月轉，爛熳送春華。
背城開小閣，西爽暮光凝。
何幸塵中見，疑從畫裏登。
名施千里集，曲檻幾人憑。
丘壑由來好，因君意倍增。

三月晦日偶憩慈仁寺

何處看春盡，閒來此梵宮。
鴉飛千樹日，鶻聚一簾風。
逐世慙蓬鬢，觀心問蝶叢。
還期迴照後，松影落庭中。

初夏高似斗名飲園亭賦贈

別館風涼勝辟疆，胸餘丘壑興偏長。
隔籬雲起方塘靜，繞徑花深陸舫香。
簾引疎篁分野色，鳥啼殘雨近斜陽。
獨醒肯愛塵中客，漫奏吳歛醉楚狂。

夏夕偶咏寄懷子延

閒庭草色晚沉沉，獨坐翻成寄遠音。
榴月照人天上影，蒲風吹酒故鄉心。
臣饑同朔堪憂歲，君志如鴻已入林。
惆悵隔年分手處，離筵曾帶雨痕深。

移居

久作偷閒計，翻因僦舍忙。
棲遲羞燕壘，事業剩奚囊。
幾載依空篋，頻遷只異鄉。
吾廬容膝好，端負夏雲涼。

獨坐

長安萬籟逐風生，塵裏爭高響未平。
獨坐乍聞還乍寂，不知入耳是何聲。

長夏苦暑言懷十四韻

逃暑真無計，驅愁且放歌。
貧憐三徑窄，熱覺一身多。
欹枕嫌親襪，經年憶負簑。
燕聲仍戀壘，蟬影乍移柯。
大地手金炙，閒門髮屢科。
選冰疑類石，覓藥爲防痾。
榴結畏

風墜葵傾倚，日和澆書心。
並懶攤飯腹，堪摩請沐吾。
甘拙矚亡客，任過揮蠅童。
自慣失馬俗，爭訛反覆依。
爐冶棲遲隔，薜蘿蠹穿書。
汗漫蟻轉歲，消磨鄉信悲。
雲漢浮生憚網羅，驕陽誰復理。
擬欲挽天河。

題雨山亭

十年巖壑興難窮，選石經營間碧叢。
峰影遙侵荷上月，波痕輕盪柳邊風。
歎流高下寒濤落，懸磴參差曲徑通。
聊築一拳堪共隱，閒情漫寄五湖東。

夏夕雨過卽事

輕雷卽復辨西東，三徑微茫雨半濛。
將夕乍明雲隙日

已晴還墮樹頭風
簾驚燕影翩颺下
磬逐蟬聲斷續同
倚檻衰衷銷永晝
屐痕欲徧綠苔中

立秋日聞馬原思之喪詩以哭之末首兼呈三如
未老驚長歿空貽慈母憂
弱齡羣子泣壯志一生浮家
藉青氊舊門橫綠草秋篋中
遺藁在倘有茂陵求
故國天難問吁嗟一邑貧
典型誰繼作風雅失斯人
露冷荒臺月蛩悽總帳塵
無生君已學消息恐難真

良朋傷永別書到正逢秋
寥落悲生事淒涼憶舊游
自傳鴻雁病遙識鶴鴒愁
剩有人琴痛將詩慰白頭

飲雨山亭和松友壁間韻四首時立秋後二日

名園分野色着屐快同遊
曉入巖光靜涼生樹影秋
甌香荷露集風細篆煙浮
水鳥行相引移來海上鷗
勝地迎秋早涼颺入座
新碧筒傾綠蟻素浪漾朱鱗
選石頻呼丈分苔乍結茵
脫冠忘主客落落幾閒人
樹密疑無岸波平忽有山
荷風千葉動荻影一舟閒
嵐遠斜仍照雷輕去復還
興酣投轄處爭似隱柴關
願同塵外客海畔結幽隣
閱世心期澹論交意氣馴
雲生常潤石風起不驚綸
已鼓桃源棹何勞問去津

雨

秋至經旬雨濛濛少斷時
暗分鴻影度涼入角聲悲遠

烟光合高城薜荔垂還將憂歲意寂寞對書帷
雨中苦悶忽張宜黃至

平濕疑無地棲遲尚有家樹聲涼帶露雨氣曉成霞吏
青門側人來淥水涯鄉書隨事好翻使客懷賒

秋夜入朝

漢晴光動高城爽氣歸河流秋更響蛩語夜偏微樹
風相應星低露并飛還思江海上侵曉臥漁磯

送馮胎仙學士別駕宋中二首

此去君應識梁園我舊游繞城修竹合夾岸大河流地
僻堪調鶴官閒只狎鷗別離吾道數滿眼足滄洲

漫憶池邊水同分珥筆廬好持藜上火自著治河書天
入中原濶鴻歸大野疎青門尊酒暮落葉滿征車

送韓念子再任山海廣文

十載同人類轉蓬憐君重去薊門東青氊秋耐關前雪
皂帽寒生塞上風海氣侵城懸落日山光繞檻送歸鴻
官閒倘有離居恨回首燕雲夕照中

寄張飛熊鎮帥二首

師保元戎控上游窮邊草木不知秋玉門萬里無烽火
疑是當年定遠侯

將軍麈閣早知名塞上重開細柳營不用嚴鞞驚絕漠

唯須緩帶作長城

送楊自西都諫

內擢後歸省

聖朝重讜議
謇諤競蜚起
我友負英標
直聲滿人耳
掖垣數萬言
嶽嶽關國是
豫遊納危論
星字陳精理
卽此兩抗章
不朽寧有比
侃侃諸靖獻
始終皆一軌
每遇皂囊上
當宁多色喜
朝達闔闔門
夕貴洛陽紙
寵命陟卿聯
內顧思甘旨
乃知令子心
豈獨重朱紫
表表著風規
傳自義方始
淵源推家學
蟬聯耀德里
放鶴與垂綸
高歌圖畫裏
甲子甫週時
筵際開菊蕊
章服已再榮
三錫行當俟
乘秋彩鷁歸
江上鱸正美
舞綵復趨庭
天

倫樂益侈願將獻納篇
拜咏當酌兕

得家兄書云酒熟蟹肥恨不與弟共之
悵狀有懷
牀頭熟釀田中秫
籬畔閒持海上螯
秋老寒風吹薜荔
醉餘落葉滿蓬蒿
天涯兄弟迷青眼
京國登臨戀敝袍
愧我鱸蓴無好夢
懸情鄉味首空搔

九日同海眉翁菴訪望石園亭登樓有作

賴有登高侶
凭欄共一臨
山青天外眼
秋冷菊中心
落葉依危石
晴烟覆遠林
夕風吹下晚
涼月照波深

孟冬朔夜霧中候 駕恭述

蒼茫天一色
仙仗迴難分
氣界秋冬際
寒生鷓鷯羣
疑

將雙闕影幻作萬山雲曉共爐煙縹氤奉 聖君

上獵南苑回午門外恭候有述

駸駸羽騎動成雷 聖主宸游校獵回臺畔呼鷹穿雪

下南苑有宮前按馬帶霜來謂離宮也寒颼細捲霓旌入晴

日遙分雉尾開猶憶甘泉頻扈從十年輦迹半蒿萊

晨興

晨興望國門寒色凌空起北風盪危樓初日照朱戟樹
枝老全白馬毛蝟還紫行循石橋立兩岸冰齒齒千里
集薪車納總競填委人牛互蹠躐霜痕各在趾及門遂
雷奔羣輻爭一軌傾否判俄頃旁觀色半死時運貴委

蛇退讓信爲美臨河再三歎予心澹如此

冬夜入朝短歌

寒星照城霜在野宵行盡是悠悠者河結冰澌半有聲
蕭疎獨聽城門下待漏由來趣不同夏時大雨今大風
彼蒼斡旋那能料却憶滄洲舊釣筒

曉寒入署之作

何來朔氣滿城中天畔羣峰望轉濛霜覆冰河遙似霧
日臨高樹曉兼風千門獵騎鳴笳早三輔薪車納秸同
落落浮生銷短晷分陰日逐馬蹄空

初度日寄家兄三首

客裏頻增歲容懷漸不同浮沉人自拙能藏術難工雁
去驚雲白寒多憶酒紅邑中酒紅者為佳知非追往事

三十一年中

靜業就風雅浮生耐寂寥鄉心隨事切壯志逐年銷病

憶壺公藥寒餘季子貂搔頭商雁羽與爾共蕭蕭

兄弟齊肩長人生幾別離每逢顏屢改久客事多違雪

盛書來少霜寒夢去遲登堂拜家慶珍重髮如絲是日即家

慈誕辰也

長至入 朝行慶禮即景有作

至日陽隨一線長五更列炬待曦光孤星靜照城邊雪

永夜寒生月裏霜曙色乍分仙仗紫爐煙微動 御衣

黃葭灰推測渾常事聞說司天竟杳茫是春司天以測管灰事獲重譴

云

宣武門外作

門外寒偏盛車塵日日過亂雲催晚照殘雪界冰河樹

古烏棲少時清吏隱多平添茅屋住近市足煙蘿

聽歌者周生

叅軍絕技出天狀曾侍開元供奉筵幾部龜茲零落盡

至今人識李龜年

寄懷馮胎仙宋中

秋高曾送客歲暮正懷人入夢梁園雪開尊汴水春宣
房勞太史簫鼓賽河神同學多寥落相期吏績新

除夕立春

當門甫帖宜春勝隔歲先傳婪尾杯兩地韶光千里接
十年壯志一時迴心驚稚子垂垂長鬢比安仁緩緩催
梅蕊柳條渾未放天涯懷抱幾曾開

澹餘詩集卷之二

終

